

PARADERA TAMBE TA HAYA SU EDIFICIO MULTI-FUNCIONAL

***Diseño di arkitekto Joël Croes ta uno hopi
moderno y ta bay satisface e necesidadnan
di ciudadanonan di Paradera y becindario***

GRATIS
AWE
Mainta
e corant di Toko



Construccion di e edificio Multi-Funcional nobo na Paradera ta cuminsa

TRABOUMAN di construccion pa e edificio Multi-funcional nobo pa bario di Paradera ta cuminsa e siman aki mes, ta loke David Britten di Thiel Materials a segura despues di e 'groundbreaking' cu a tuma luga net dilanti di Hulpbestuurskantoor di Paradera dialuna mainta tempran. Presente e mainta aki tabata entre otro Prome Minister Mike Eman, directora di MFA Aanky Vrolijk, Manager asistente di MFA Paradera, Sr. Mario Kelly, representante di Ministerio di Asuntonan General, Sr. Omar Harms, Ingenieronan di DOW Dennis Wever y Jossy Kock y tambe e arkitecto hoben cu ta diseñador di e edificio, Joël Croes. Prome Minister na final di e groundbreak-

ing a bisa di ta hopi contento di por inicia e trabounan pa e Edificio Multi-funcional di Paradera cu ta bay ubica, entre otro, e hulpbestuurskantoor di Paradera. "Si bo mira con ocupa awo aki mes, e edificio di Hulpbestuurskantoor ta pa motibo cu na esun di Sta. Cruz mester haci reparacion na e dak, bo ta wak cuanto ciudadano ta haci uzo di e Hulpbestuurskantoor." Arkitecto di e edificio multi funcional, Joël Croes a splica cu, "nos ta hopi contento di por ta akina despues di e 'voorbereidings-fase', den cua nos a prepara e diseño y e mapanan, y nos ta 'looking forward' pa e start di e construccion di un edificio moderno. Den e contexto di Paradera nos kier

mantene, contene y conserva e naturalesa, mata y piedraanan." Sr. Croes ta referi aki cu ta bay haci tur loke ta posibel pa haci di e naturalesa existente parti di e landscaping. Manager asistente di e MFA di Paradera, Sr. Mario Kelly, a splica cu e idea di MFA-nan a bin di Prome Minister, "pa duna e comunidad mas comodidad na e centro-nan aki." Sr. Kelly ta sigui splica cu, como trabou preparatorio, nan a pasa na tur e Hulpbestuurskantooranan y a constata cu headenan ta hopi riba otro, "yeseykiermen cu e facilidadnan no ta apto pa e cantidad di headenan cu ta haci uzo di e oficinaanan auxiliar," Sr. Kelly a detaya. "Esaki ta algo hopi grandi pa e districto di Paradera y becindario, un edificio asina moderno cu ta bay ta un alivio hopi grandi pa pueblo di Aruba."

Honor di e groundbreaking a bay pa director di MFA-nan, Sta. Aanky Vrolijk, cu den un caterpillar a cuminsa simbolicamente hala santo riba e tereno destina pa e edificio

Multi-funcional cu ta premira pa keda cla comienso di aña 2016.

Esaki ta e di dos edificio Multi-Funcional cu ta den construccion. Na Noord a cuminsa april aña pasa cu e edificio y ta premira cu esaki ta keda entrega den maart e aña aki. Gabinete Mike Eman su vision ta pa extende e idea basico di un Hulpbestuurskantoor tradicional na Aruba. Noord, Paradera, Sta. Cruz, Savaneta y San Nicolas ta haya Edificionan Multi-Funcional. Banda di ta inclui un Hulpbestuurskantoor, den e edificionan Multi-Funcional ta ubica tambe otro servicionan importante pa comunidad manera AZV, biblioteca por ehempel. Tambe ta bay tin espacionan pa lesanan cultural, musical y di baile entre otro. E edificionan tambe ta bay tin como meta principal pa trece comunidad mas cerca di otro ofreciendo servicio y actividadnan interesante pa cada bario. Den caso di Noord, ta bay tin un cooperacion estrecho entre e MFA y e centro di Bario cu ta situa net pariba di dje.